

Buna sira, buna sira me cari siuri! E ben c'me c'la và?

Me, pruma ad c'mensè a j'era an po' po' preocupà. Se, perchè con tuti ist'esternasion - oh! i m'on dicc che giuntaj tuti ansema i son duraji quasi 550 uri, quasi doi meis e mes!! - a j'ho pensà: chi sà se la gent a n'ha ancora voja ad senti el meji che pò, a la longa, al masim i duru des minut?

Ades c'av vigh chi, la preocupasion a mè pasaja e vujater stè pura tranquil: me d'esternasion a n'ho mai faci e a na farò mai meja! Me a dig cul c'um ven an ment quondi ca vag an gir per la sità, a uard la gent ant'el mur e a vig c'l'è tuta brava gent c'la travaja, c'la va a fè speisa, c'la spasia an t'el Curs, c'la uarda el vidreini e a serc ad capì se chi pensu e se chi disu ad cul cui suced an sità e an gir per l'Italia e ant'el mond. Pò, ogni ani, da chi ansuma, ant'ist teater di sti bravi Frà e con l'ajut ad tucc sti bravi fiò e fiji chi von a scola, i studiu e pò i venu chi antl'Asuciasion per truves tucc ansema, senti na parola bouna e fè del ben, ogni ani, a diva, da 67 ani, pruma ad c'mensè la Divota Cumedia, a pos nent fè a menu ad cüntev cuc cosa ad cul ca j'ho sentì.

Ist'ani a pudreiva quasi quasi ripeti tut la businà ad l'an pasà! Se, perchè u j'è propi cambià gnente, onsi, sa pensuma a la circulasion, a l'è ancora pegiuraja! Pruvè an po' a rivè an via Cavour con la machina, si sei bon! Pruvè an po' a entrè an sità rivonda dal pont d'la Sitadela! U smeja chi fasu in atra piasa d'armi le andò cu j'era piasa Gobetti. Mah! E uardè che in "mah!" dicc da in Lisondren el vò dì tonc afari, neh!

I pulitic anveci se chi fon? I pensu semper an mac per lur e se la gent la prova a fej savej che la vita ad tucc i dì, el preocupasion e anche el sudisfasion i son nenta culi chi pensu lur, ma i son diversi, i son nenta culi di Cungres, del gron riunion, i l'ha ston gnonca a senti perchè i son preocupà ad nent perdi el cadrighen. E pensè che ansuma a sti cadrighen a j'uma butà noi, speronda chi fasu i noster interes! Ma ades l'è mej ca la pionta lé con sti argument se no magari cuc d'en el pensa ca seja 'd la Lega. No! noi a Lisondria a na cunsuma an mac j'eina ad Lega: l'è la Piasèta che ades, umbogna dil, a l'è propi bela. J'on rangià l'obelisco, j'on butà el bancheini e speruma chi trovu na solusion anche per l'edacula di giurnal perchè piasaja lè an fond al Curs la stà propi ma, neh! Eh, i n'on spendi di sold neh! In me amis, na vota ca pasavu da lé u m'ha dicc: "A vigti, chi an Piasèta u j'è propi du tut: da na part u j'è il Credito Italiano, e se t'at giri da l'atra at vighi il... Debito Alessandrino!!". Ma

l'è nent a basta! Vujater, per esempi, c'mè ch'jei facc a rivè fùna chi? A pé, an machina? U sarà mej ch'i v'alejni a andè an biciclèta perchè el noster Cumen el vò spendi 14 miliard per fè le "piste ciclabili". Me a dig che anveci ad fè tucc sti gron pruget u sareiva mej chi spendjsu cuc cosa ad menu e chi fjsu rangè tut el bogi cu j'è ant'el strà, specialment andonda cuj pasa j'autobus! Anlura la gent l'andreiva pù vulertera an biciclèta, senza d'ambsojn ad tonti pisti! E po', dato che ad sold da trè veja a n'ha juma toncc, chi a Lisondria, au Sendic u j'è amni an ment ad fè scrivi e püblichè la "Storia di Alessandria". Dis ca s'l'ha rancuma con poc, neh! An mache in miliard e mes! senza IVA. Us capis che ades u Sendic el vo fè l'onorevole, l'ha d'ambsojn an po' ad reclam, ma a me u smeja che in miliard e mes u seja an po' trop!

Oh! meno male che noi Gilindo al fuma semper chi! Figurev che grouna c'ui sarejva sciudì sa fjsu andacc a presentel an Pruvincia anveci che an Municipio! J'ei senti se cu j'è suces quondi ch'j'on presentà la squadra di Grigi! Uj n'è andacc in bel po' pruma chi fejsu la pas!!

L'è che ades i son fina an po' su ad classifica i Grigi: speruma ch'is tiru su perchè se no an sist palc u j'è di tifus chi venu semper pu nervus e i travaju nenta ben!

Uardè cu na j'è del strambaleiri an t'el mond neh! Per esempi: c'mè c'l'andrà a finì la quistion ad Beautiful? Eh!, vujater i reji ma l'è na roba seria, neh! Us n'è funa anteresà el President ad la Republica. U s'è funa facc mandè el film d'an America perchè là i son pu anon che noi an tut e la gent l'è tuta preocupaja: "Ma Sablina at senti, dis che Ridge us fa previ e Carulina as fa monia! - Uarda te, e pensè ch'i s'aurivu acsi ben!" e su a parlen per mes'ura ch'me che s'el fjsa l'afari pu ampurtont del mond!

E i telefonen? Me a dig chi son tucc mat! Is la portu adrera da per tut: ant'i risturont, an su trenu, ant'el bar - a j'ho vist jën ch'el parlava mangionda na brioss! Che maledücà! Ul sa nent c'us parla nenta con la buca pejna!

Na vota a j'era au supermercato e a vig jën a taca in bancon ch'el parla da bele sul. "U starà nenta ben" a j'ò pensà e am son ausinà per vighi s'lava d'ambsojn cuc cosa e lü u s'è girà e a j'ò vist c'lava in afarien neier ataca à l'urigia e el parlava tut cunvint: l'era adrera cui ciamava a so mujè se c'l'ava da crumpè. Na bela scuperta! L'era andacc au supermercato per risparmié e u spendiva in mugg ad sold ant'la telefonada! L'è mei chi s'al portu nent adrera quandi chi von ant'el bagn perchè us pudreiva senti cuche scarica!

Comunque tucc i pais del mond j'an cuche preocupasion tant che i

president d'America, d'Inghiltera, d'la Fronsà e Andreotti na vota is son butà d'acordi e i son andacc a parlè cou Signur. J'on parlà an pò e po' j'an ciamà: "Quanc'ani cu j'andrà ancora prima che la me gent la seja cuntenta e sudisfacia?" e u Signur u j'a rispundì: "Per l'America u j'andrà des ani, per l'Inghiltera 15, per la Fronsà 20". E po' l'è stacc citu. Anlura dop an po' Andreotti uj fà - "Signur avei pasiensa, e per l'Italia?" - U Signur u s'è girà da l'atra part e u s'è buta a piansi! Per furtejna a l'è an mac na barselèta.

Noi Cristian a j'uma na speransa, cula cu m'ha purtà el Bamben quandì c'l'è nasì chi an mes a noi. E noi chi stasira auruma ricordè, a la nostra manera, propi ist gron avveniment.

Ades a tacuma e av present la me famija...

